




*Selasa, 21 Desember 2021*

**Ogen: I Tesalonika 4:1-11**



**Sitatang-tatangen Ras Sisampat-sampaten**



**S**alah sada dahin si erban kemalemen ate eme nampati kalak sideban. Dahin enda mberat tapi tuhu-tuhu erban ngena ate Dibata. Bali bagi kata persinget si ipeseh Rasul Paulus nandangi perpulungen i Tesalonika. Erbage-bage kata persinget ibereken Paulus, kususna i bas nehken keleng ate. Keleng ate nandangi pasangenta, jelma sideban bagepe nandangi Dibata. Biak-biak enda erban teneng, malem ras dame. Nggo nge sedekah enda kita ndalanken dahin enda? Mari sinin kerna kegeluhenta.

Manusia nggeluh perban keleng kal ate Dibata kita, kita? Keleng nge ateta Dibatanta? Bali bagi si lit i bas ayat 8, nina : *“emaka kalak si nulak pengajaren enda labo manusia si itulakna, tapi Dibata si mereken Kesah Si Badia man bandu nge si itulakna.”* Pemahaman enda me penjemba kita selaku anak-anak Dibata ndalanken dahinNa i babo doni enda. Salah sadana, e me nggeluh si tatang-tatangen ras si sampat-sampaten. Sada bagin nggeluh erdiakonia pe banci si dalanken bali bagi kai si ilakoken Jesus tupung IA bas doni enda, nggeluh nampati jelma si nterem ras nggejapken ntahpe ikut natang kerna kiniguluten manusia. Uga pa pe perbayakna jelma, uga pa pe perpentarna jelma kerina lit kelemahen ras kekurangenna. Jadi, manusia seri i lebe-lebe Dibata. Selaku seri ras tempas Dibata pe, manusia erkewajipen nggejapken kerna kiniseran temanna sideban. Bali bagi istilah kalak karo, *aku kap kam, kam kap aku*. Aku seri ras kam, kam pe seri ras aku. Suiku jadi suindu, suindu jadi suiku eme ikataken ngeluh sitatang-tatangen ras sisampat-sampaten. Lit sada stiker si itempel bas sada angkot nina, *Kita tidak tahu apa yang akan terjadi besok karena bisa saja besok kita sudah tidak ada lagi di dunia ini, oleh karena itu banyak-banyaklah berbuat baik agar kita bisa berakhir baik*. Uga dage ninta kalimat stiker enda? Mari nggelulah kita si tatang-tatangen ras si sampat-sampaten.